

Cartë nabëquë'ë Santiago

**Bëshe'ldë Santiago saludë lu ra
naquërelde fuërë ladzë rai'**

1 Na Santiago, nahia muzë shtë
Dios nu shtënë Jesucristo,
Shláma'a. Quëgshe'lda saludë lu
të naquërelde fuërë ladzë të, lu
të naná chi'bë chupë grupë shtë
mënë israelitë nabërë'tsë lu guëdubi
guë'dchiliu.

Llni naze'dë de Dios

²Lë'ë të bëchi la sahia, gulë
bëquitë ldu'u të iurë ze'dë cusë
durë narzac zi ³purquë nané hia'a
por medio ra cusë durë rlu'a si
talë tsagla'guë rialdí ldu'u hia'a de
verdá. Nu nané hia'a iurë rúnël gan
lu ra cusë durë, más fuertë nal parë
tsaglá'guël shnezë Dios. ⁴Gulë gac
të mënë pacënci guëdubi tiempë,
nu gulë gac të mënë narac rúnël
voluntá shtë Dios sin ni tubi faltë.
Iurní gúnël cumplir lo quë narac
shtu'u më.

⁵Si tubi de lë'ë të adë ráquëdi'il,
runë faltë llni, gulë guna'bë lu Dios;
Dios guëne'e më llni parë lë'ë të.
Guëne'e mëhin sin medidë, nu adë
guëni'idi'i më guëc të por rna'bë
të lúhi'. ⁶Perë napë quë guëná'bël
lu më con galërialdí ldu'u. Grétë'

el quë nadë rialdídi'i ldu'i shti'dzë
Dios, ni na ziquë olë shtë nisëdu'u
iurë lë'ë mbë dushë ze'dë. Rua'a
mbë nisë nezë rë' nezë rë'. ⁷El quë
nadë rialdídi'i ldu'i Dios de verdá,
adë gúnëdi'ill llgabë de quë guëdë'ë
më lo quë narná'bëll. ⁸El quë
narunë chupë llgabë, nádi'i firmë
conductë shtëni'.

⁹Lé'ël shmënë Jesús narunë
llgabë nádi'il më ru'bë la'ni
guë'dchiliu, gulë bëquitë ldú'ul
purquë de vërë nal më ru'bë lu Dios.
¹⁰Nu gulë bëquitë ldu'u të naná
ricu iurë rne'e më galnadu'u, iurë
rac bé'al galëricu verdadërë; cusë
ni ra mënë shtë guë'dchiliu runë
rall desprëci. Gulë bëquitë ldu'u të
purquë ziquë ra guë'ë lachi, ra ricu
con grë ra cusë material nanapë
rall, rialuhin. ¹¹Iurë rru'u ngubidzë,
rza'i ngubidzë lë'ë guë'ë; hia adë
rluá'adi'i ra guë'ë chulë. Zni na fin
shtë ricu con grë negoci shtënell.

Ra dificultá nu tentación

¹²Rquitë ldu'u mieti natsagla'guë
firmë lu shnezë Dios aunquë rzac
zi mënë lë'ëll purquë iurë tsalú
lë'ë galërzac zi, gúnëll recibir
bendición naná vidë sin fin. Bë'në
më prometer vidë ni parë grë ra

narac shtu'u lë'ë më. ¹³Cualquier de tubi të iurë rdchini mal llgabë parë gúnël mal, adë rúnëdi'il llgabë de quë Dios guësëdchini më llgabë ni guéquël, purquë Dios nunquë rsëdchínidi'i më mal llgabë parë gúnël duldë. Nídi'i mudë chu guësëdchini llgabë mal lu Dios. ¹⁴Iurë tubi de lë'ë të rac shtú'ul gúnël duldë, na purquë la'ni ldu'u mizme lë'ël nanú deseo mal. Ra deseo mal rsëdchini mal llgabë parë lë'ël. ¹⁵De deseo mal nananú la'ni ldu'u mieti, ze'dë mal llgabë; hia de nga'li runë mieti duldë; hia de nga'li ze'dë galguti parë nguii ni.

¹⁶Lë'ë të narac shtua'a, adë tsaldídi'i ldu'u të el quë narsigué sáhi' ¹⁷purquë grëtë' cusë za'quë ze'dë de Dios, el quë nabënts'a'u grë mbelëgui'i nu ngubidzë. Na më lo mizme guëdubi tiempë; nídi'i cambi parë lë'í'; nádi'i më ziquë cusë narunë ra cambi shcaa'lë. ¹⁸Bëne'e më vidë sin fin parë lë'ë hia'a sulë purquë zni guc shtu'u më. Bëdchini vidë sin fin por medio de ra di'dzë naná verdá. Zni rac shtu'u më gáca'a primërë ejemplë entrë grë ra shini më natsaldí ldu'i shti'dzë më. Na ziquë tubi mënë quëgláguëll primërë nashi za'quë lu hiaguë iurë guëdchini tiempë shtë cusechë.

Enseñansë verdadërë

¹⁹Por ni, bëchi narac shtua'a, gulë bëdë'ë cuendë de quë cadë tubi të napë quë gac nasínil parë guéquë diáguël perë parë guadí'dzël, gulë gupë cuidadë. Gulë bë'në llgabë bien antsë guadí'dzël. Nu adë guëdë'ël sí ldaguë llanë la'ni ldú'ul ²⁰purquë llanë shtë mënë, adë

rsëdchínidi'in vidë za'quë delantë lu Dios. ²¹Gulë bësa'në grë cusë mal nananú la'ni ldú'ul con grë llanë nananú la'ni ldú'ul, nu gulë bë'në recibir diza'quë nabëgabni la'ni ldu'u të. Napin pudërë parë gac salvar të.

²²Gulë bë'në grëtë' lo quë narni'i diza'quë, lëdë niá'asëdi'i quëquë diaguë tëhin, purquë si talë no más rquë diáguël nu adë rúnëdi'il cumplir, hia iurní lo mizme lë'ë të quëguguë të lë'ë të. ²³Grëtë' el quë niá'asë rínill nu rquë diáguëll shti'dzë më perë adë quëhúnëdi'ill cumplir lo quë narni'i shti'dzë më, ni na ziquë tubi nguii narbi'a la'ni guë'guanë nia lla na lull. ²⁴Rnall lla na lull perë lueguë lë'ël zia'all, iurní rëa'ldë ldú'ull lo quë nangunall. ²⁵Perë grëtë' el quë natsagla'guë rsë'dë la'ni lëy shtë Dios, quëzu'bë diáguëll shti'dzë më; gunë ldai' më lë'ë nguii ni. Cagnia'a shcuendë lëy nangunë librar mënë de grë cusë mal.

²⁶Stubi de lë'ë të rni'i riaglá'guëll shnezë Dios perë adë ráquëdi'i rcuë'zël ra di'dzë mal narní'il; mizme lë'ël rsiguë lë'ël. Hia ldai' nanuá'al lasáquëdi'in. ²⁷El quë nangunë compa'ni ra bëzebi nu ra viudë con nicidá nanapë rall, nu el quë naquëhapë mizme lë'ël de grë duldë, rna Dadë Dios lu nguii ni ziquë tubi lari limpi sin ni tubi manchë. Pues nuá'all ldai' narëu'ul ldu'u Dios.

Gulë bë'në tratë igual grë bëchi sa'l

2 Lë'ë të bëcha, rialdí ldu'u të Dadë Jesucristo, el quë narlua'a pudërë shtë Dios lu hia'a. Gulë bë'në tratë igual con grë bëchi

sa' të. ²Ziquè tubi comparaciuni, si talè tsutè tubi nguiu ricu, nanú nigi guíá'ai' nu nácuhi' lari za'què; tsutèll ladi catè rdéa ra shmènè Dios; nu mizmè tiempè tsuté tubi mè prubi con lariullè. ³Si talè lé'èl gúnèl atender bien naná nua'a lari za'què nu lu ricu ni guèní'il: "Lé'èl guzubè lugar za'què". Perè lu prubi guèní'il: "Lé'èl nga'li guzuldí", u guèní'il lu prubi: "Guzubè lu guiu'u". ⁴Hia iurní quègutèl diferenci entrè ladi mizmè lè'è të. Hia iurní quèhúnèl tratè chupè manèrè lu sa'l. Hia quèhúnèl juzguè ziquè juèsi con mal llgabè.

⁵Lè'è të bëchi narac shtua'a, gulè bèdè'è cuendè de què gudili Dios ra mènè nanápèdi'i zihani cusè shtë guédchiliu perè napè rall galèricu verdadèrè purquè rialdí ldu'u rai' Jesús. Nu gunè rall recibir herenci; guèquèrèldènú rall Jesús catè rnibè'a mè. Zni bè'nè mè prometer dizdè más antsè. ⁶Perè lé'èl, el què narná zá'quèdi'i lu bëchil naná prubi, nu rac shtú'ul gáquèl amigu shtë ra ricu; guná, ra ricu rzac zi rall lé'èl. Ra ricu rdchi'bè rall demandè cuntrè lé'èl lu ra juèsi. ⁷Nu ra ricu rushtiá rall guèc të iurè ruadi'dzè të shti'dzè Jesús. Guna'zi të lè mè iurè guc të shmènè mè. Lè ni napin llèru'bè hunurè.

⁸Si talè lé'èl de vèrè quèhúnèl cumplir lè'è lèy nabène'e Rëy naquèbezè gube'e, lèy naná escritè la'ni Sagradas Escrituras narni'i: "Gulè guc shtu'u grè ra sa'l igual ziquè rac shtú'ul lé'èl". Si talè quèhúnèl cumplirin, bien quèhúnèl. ⁹Perè si talè rguflil lo què narac shtú'ul nu adè rac shtú'udi'il sa'l,

iurní canihúnèl duldè; nápèl faltè purquè adè bé'nèdi'il cumplir di'dzè shtë lèy. ¹⁰Si talè tubi mènè quèzu'bè diáguèll grètè' puntè shtë lèy perè quèhúnèdi'ill cumplir tubsè puntè, iurní nall culpablè parè lèy. ¹¹El què naguni'i: "Adè rúnèdi'il duldè adulteri", nu zac guní'i: "Adè quínidi'il sa'l". Si talè adè chu rúnèdi'i duldè adulteri perè gudínill sa'll, adè bé'nèdi'ill cumplir grè puntè shtë lèy, nu nall culpablè. ¹²Por ni, gulè biadi'dzè lu sa'l nu gulè guquèrèldè ziquè ra mènè nané gunè mè juzguè lè'è të según shti'dzè Jesús. El què naquèhunè cumplir lèy shtë mè, nádi'ill muzè shtë duldè. ¹³Gunè Dios juzguè el què nadè rgá'adi'i ldu'i sáhi'; adè guègá'adi'i ldu'u mè lé'èl. Perè el què narga'a ldu'i sáhi', guèrú'ull bien iurè tsu juici shtë mè.

El què narialdí ldu'i nu quèhúnèll cumplir

¹⁴Dadè, òpè runè sirvè si talè tubi nguiu guèní'ill rialdí ldu'ull shti'dzè Dios perè quèhúnèdi'ill cumplir shti'dzè mè? Nguiu ni adè gac salvárèll. ¹⁵Si tubi shmènè Jesús runè faltè shábi' u dau shtëni', ¹⁶nu lé'èl guèní'il lu nguiu ni: "Guziá'al con bien; guène'e mè nagácul nu lo què nagául". Perè lé'èl adè pè rdé'èdi'il lo què narqui'ni sa'l, òde què sirvè nápèl fe? ¹⁷Zni na, el què narialdí ldu'i shti'dzè Dios de verdá napè què guèluá'all fe shtënéll por lo què naquèhúnèll. Si no, nápèdi'ill fe verdadèrè.

¹⁸Bien zac guèni'i tubi nguiu lu sa'll: "Lé'èl nápèl fe; na quèhuna compa'ni ra sahia". Perè rnía'a lul, bèlua'a de què

rialdí ldú'ul Dios; guénahia fe shténēl. En cambi, na guēluá'ahia lē'ēl de quē rialdí ldu'a shti'dzē mē purquē rnal bien naquēhuna lu sahia. ¹⁹Lē'ēl rní'il de quē rialdí ldú'ul nanú tubsē Dios; bien canihúnēl, perē rnia'a lu de quē ra mēdzabē rialdí ldu'u rall nanú tubsē Dios, nu rchi'chi rall por galērdzēbē nananú la'ni ldu'u rall. ²⁰Lē'ēl nadē rdē'ēdi'il cuendē, ¿pē adē guēnédi'il de quē nguii nanapē fe verdadērē, también canihúnēll bien con sa'll? ²¹Gulē bēdē'ē cuendē, lē'ē shtadē guēlú hia'a Abraham, iurē bē'ni' ofrecērē shíni' Isaac lu bēcu'guē, bēlua'a Abraham de quē tubldí na shcuéndi' lu Dios. ²²¿Gu riasēl iurní? lēdē niá'asēdi'i gualdí ldu'u Abraham shti'dzē mē perē bē'ni' cumplir lo quē nagoni'i Dios. Zni fe shtē Abraham bēru'u lu llni tē guená grē mieti lo quē nabē'ni'. ²³Zni guc cumplir Sagradas Escrituras narni': "Abraham gualdí ldu'i shti'dzē Dios nu Abraham bēá'ni' bien lu Dios sin ni tubi faltē". Guni'i Dios, Abraham na amigu shtēhi'. ²⁴Rac bē'a hia'a por lo quē nacanihunē nguii, rlua'a tubldí na shcuéndi' lu Dios, lēdēdi'i por fe nanápēll sulamēntē. ²⁵Nu zac Rahab, tubi na'a mal, guc tubldí shcuéndi' lu Dios por lo quē nabē'nēll. Bē'nēll recibir ra nguii nabēshe'ldē Josué lu guē'dchi, nu bē'nē Rahab compāni ra mēnē ni parē bēru'u rai' stubi tēchi nezē. ²⁶Ziquē unidē na cuerpē nu espíritu parē guēbani mieti, zni napē quē tsaldí ldú'ul Dios nu napē quē gúnēl cumplir con cusē za'quē.

Lo quē narní'il

3 Bēchi, entrē ladi tē adē tsúdi'i gac tē zihani mēsē

parē lu sa' tē purquē nanē hia'a gunē mē juzguē ra mēsē con más fuersē quē cualquier mēnē. ²Pues grē hia'a siembrē runē faltē guēdē'na'a cumplir shti'dzē mē. El quē nadē rúnēdi'i fallar en lo quē naruadí'dzēll, pues nguii ni hia na tubi nguii za'quē nu rac gúnēll gan lu grē deseo mal nananú la'ni ldú'ull. ³Iurē lē'ē hia'a rlu hia'a frenē rua' guay parē runē du'in lē'ē ma, zac guēdē'na'a manejar guēdubi cuerpē shtē ma. ⁴Gulē guná; nanú barcu ru'bē nariá lu nisē. Nu zihani vueltē ze'dē mbē dushē al contrari, perē lē'ē narsē lē'ē barcu rsēll lē'in nadē más por tubi dimē mitu'nē. Tsa barcu catē rac shtu'u narsē lē'ē barcu. ⁵Zni zac con ldudzē mieti; nahin tubi partē mitu'nē parē cuerpē shtē hia'a, perē blac runē nadchini ra mēnē iurē ruadi'dzē rall. Gulē guná; tubi hiu'u gui'lli tsequi por tubsē be'lē mitu'nē. ⁶Zni na ldudzē mieti; nahin ziquē tubi be'lē. Nahin capaz parē zihani cusē mal. Ziquē ldúdz'a'a nahin tubi partē bi'chi entrē grē partē cuerpē shtē nguii, nu quēhunin manchar guēdubi cusē naquēhunē nguii. Dzē trasē dzē hashtē gati mieti, ldudzē mieti quēgza'i vidē shtē mieti. Ldudzē mieti na ziquē be'lē naze'dē de gabildi. ⁷Lē'ē nguii rac runē du'u grē clasē ma, ra ma dushē con ra ma'ñi, ra serpientē con grē ma nananú la'ni nisēdu'u. Rac runē du'u nguii ra ma, ⁸perē ldudzē nguii, ¿chu rac gunē du'u ldúdzi'? Na ziquē tubi ma nadē nēdi'i gac du'u. Ziquē lai' serpientē nua'a venenē narguini mēnē, zni na ldudzē mieti. Gadzēhin con maldá.

⁹Con mizmə rua' hia'a quédé'na'a alabar Dios, Shtáda'a, nu mizmə lë'in rgue hia'a guéc sa' hia'a, el què nabèntsa'u Dios. Bèntsa'u më lë'è hia'a; nadápa'a llni shtë më të gáca'a ziquè lë'è më. ¹⁰Con mizmə rua' nguiu rúnëll alabar Dios nu rguell guéc sa'll. Pues rnia'a lu të, bëchi, adè rúnëdi'i tucarè gunè mieti cusè ni. ¹¹Gulè guni'i lua, ògu rgul nisè nashi la'ni guèrzú nu lueguè rgul nisè lda mizmə lugar? Aquèdi'i. ¹²¿Ni mudè guène'e hiaguè higu nashi acetuna, u tubi hiaguè uvè guène'e nashi bèlda'u? Nídi'i mudè tubi zini guène'e nisè dchiguè nu mizmə tiempè guène'e zini nisè nashi.

Llni naze'dè de Dios

¹³Si talè nanú tubi mènè entrè ladi tè naná runè ráquëll nu riasëll, pues guèluá'ai' conductè za'què lu ra sáhi'. Gúni' cusè za'què nu gáqui' më nadu'u según llni naquëgdèl'è Dios léti'. ¹⁴Perè si talè nalé runè nadchínil u rzebi ldú'ul pè shtë sa'll, adè rní'idi'il nápèl llni shtë Dios purquè nal falsè. Adè quèhúnëdi'il cumplir verdá shtë më iurní. ¹⁵Lè'è llni narni'i nápèl, nádi'in llni naze'dè de Dios sino nahin llni shtë gué'dchiliu rë'; nahin llni ziquè napè ra mènè naguënèdi'i Dios. Nahin llni naze'dè de mëdzabè. ¹⁶Catè runè nadchini nguiu lu sa'll, nu rac shtu'u nguiu gúnëll gan lu sa'll, nga'li nanú dishi'bi con grè clasè mal. Nádi'i tè unidè. ¹⁷En cambi, el què nanapè llni naze'dè de Dios, primèrè nápèll tubi vidè za'què sin adè rzébidi'i ldú'ull pè shtë sa'll; adè rëuu'di'i ldú'ull

dishi'bi; nall më nadu'u. Nápèll rëspèti lu sa'll: rga'a ldú'ull lu sa'll. Rúnëll cusè za'què parè ra sa'll. Quèhúnëll tratè igual con grè ra sa'll; adè nádi'ill ziquè mènè falsè. Derechè ruadí'dzëll. ¹⁸Ra narac shtu'u cue'dchí ldu'u mieti, na rall ziquè tubi nguiu narcabní tubi guiu'u. Gápèll ziquè tubi ganza'què, quiere decir, tubi vidè naná tubldí lu Dios nu delantè lu ra sa'll.

Adè gac shtú'udi'il ra cusè shtë gué'dchiliu

4 ¿Ca nezè ze'dè ra dishi'bi nu disgustè entrè de ladi tè? Pues ze'dè rahin de mal deseo nananú la'ni ldu'u tè. Ra deseo mal na enemigu shtë ra cusè za'què. ²Rzebi ldu'u tè pè cusè perè adè rúnëdi'il recibirin. Rguini tè sa' tè tantè rac shtu'u gapè tè pè shtë mènè, perè nilè con ndè gúnëdi'i tè recibirin. Iurní rdildi tè nu nanú dishi'bi entrè lè'è tè; adè rúnëdi'i tè recibirin purquè rná'bèdi'i tè lu Dios. ³Si talè rná'bèl tubi cusè, adè guène'e mëhin purquè quègná'bèl con mal llgabè. Rac shtú'ul pè cusè sulè parè gúnèl cumplir mal deseo nananú la'ni ldú'ul. ⁴Lè'è tè adè rúnëdi'i tè cumplir comprumisi nabé'nèl con Jesús. ¿Pè riasédi'il el què narac shtu'u ra cusè shtë gué'dchiliu, quèhúnëll cuntrè Dios? El què narac shtu'u tsanaldè tèchi ra cusè shtë gué'dchiliu, nall contrari shtë Dios. ⁵¿Pè rdé'èdi'i tè cuendè lo què narni'i Sagradas Escrituras? “Dios bèshe'ldè Espiritu Santo la'ni ldu'u hia'a nu nalé rac shtú'ui' guèquèrél'da'a sulè parè lè'è më”. ⁶Por ni rne'e më más favurè nu

llni parë lë'ë hia'a. Nu rni'i Sagradas Escrituras: "Dios rzu lu ra nguii narac shtu'u gac rall më ru'bë, perë quëhunë më compa'ni con cusë za'quë grëtë' nguii nanadu'u". ⁷Gulë bëzu'bë diaguë shti'dzë më. Adë guëdë'ëdi'il sí lo quë narac shtu'u mëdzabë. Gulë sutipë lu mëdzabë nu guëllú'nëll lul. ⁸Gulë bëtë'ë sí cuesënú Dios lé'ël, iurní cuesënú më lé'ël. Lë'ë të nanapë duldë, gulë bëabrí ldu'u të con Dios. Lë'ë të nanapë chupë llgabë, gulë bëlua'a téchil lu ra cusë mal. ⁹Gulë gubini ldu'u të por duldë nabé'nëll. Gulë bi'ni. Gulë cushtiá; gulë bë'në cambi galërquitë ldu'u por galëru'në. Lë'ë të narquitë ldu'u purquë nal amigu shtë guë'dchiliu, gulë gubini ldu'u të por tantë duldë nanápël. ¹⁰Gulë gac më nadu'u delantë lu Dadë, iurní gunë më honrar lë'ë të.

Adë gúnëll juzguë sa'll

¹¹Gulë cuesë guëni'i të cuntrë sa'll të. El quë narni'i cuntrë sa'll nu quëhúnëll juzguë conductë shtë sa'll, mëné ni quëgní'ill cuntrë lëy shtë Dios, nu quëhúnëll juzguë lë'ë lëy. Si talë rni'il shti'dzël lasac perë lëy adë lasáquëdi'in, iurní quëhúnëll mizmə lé'ël ziquë tubi juësi. Adë quëhúnëdi'il cumplir lëy shtë Dios iurní. ¹²Nanú tubsë nabëne'e lëy nu napë më pudërë parë gunë më salvar ra mëné, nu napë më pudërë parë gunë më condenar ra mëné. Perë lé'ël, nápëdi'il derechë parë gúnëll juzguë stubi sa'll.

Tsalú grë ra cusë shtë guë'dchiliu

¹³Gulë bëtë'ë cuendë lë'ë të narni'i: "Nedzé u glii tsahia stubi

ciudad. Ndë guëquërela tubi izë parë sia nu guëtúhia; guna gan dumí." ¹⁴Rni'il zni perë adë rac bé'adi'il pë gac glii. ¿Lla na vidë shtënl? Nahin ziquë tubi behu. Rlua'ain por du'pë tiempë, lueguë rnitiluhin. ¹⁵Lo quë narunë tucarë guëni'il na zndë'ë: "Sulamëntë si talë na voluntá shtë Dios, guna dchi'ni rë' u guna stubi cusë". ¹⁶Perë lë'ë të ruadi'dzë të nadchini purquë rialdí ldú'ul mizmə lé'ël, perë grë ra naruadi'dzë nadchini, mal nahin. ¹⁷El quë narac bë'a pë na bien perë adë rúnëdi'ill cumplir, pues nápëll duldë.

Cunseju parë ra ricu

5 Gulë bëquë diaguë ndë'ë, lë'ë të naná ricu. Gulë bi'ni nu gulë cushtiá por ra desgraci naná ze'dë guëc të. ²Ra galëricu shtënl të na ziquë cusë naru'dzë. Grëtë' lari za'quë shtënl të hia gudáu ra mbichúguëhin. ³Ra orë nu bédchichi guna'zi tèn luhin. Lë'ë tèn na testigu cuntrë lë'ë të de quë rzebi ldu'u të dumí. Ziquë tubi be'lë rza'i lë'ë shcuerpë mieti, zni gunënú tèn shtë dumí lë'ë të. Bëzu'bë muntuni të galëricu parë tiempë ne' perë hia mërë guëdchini fin shtënl të. ⁴Ra pagu narunë tucarë ca'a ra nabë'në dchi'ni, adë bëtë'ëdi'i të ca'a muzë. Guagldë rall guëni'a shtënl të perë adë gudíllidi'i të completë sino bësiguë të lë'ë rall. Iurní mizmə muzë ni quëhunë rall reclamë. Dios naná rnibë'a guëdubi gube'e, bini më galru'në shtë rall. ⁵Lë'ë të guquërelde të lu guë'dchiliu con galëlujë nu bë'në të cumplir cualquier deseo mal nanapë të. Ziquë

tubi ma ndchu, na ma parë gati, bësëndchú të lë'ë të con ra cusë shtë guédchiliu. Hia gue'dë guèdchini dzë parë gac juzguë të. ⁶Lë'ë të bè'në të condenar ra nanápèdi'i faltë. Gudini të ra mënë nanápèdi'i duldë perë adë bédchí'bèdi'i rall demandë cuntrë lë'ë të.

**Gulë gac më pacënci nu
gulë guna'bë lu Dios**

⁷Por ni bëchi, gulë gapë llëru'bë pacënci hashtë guëabrí Dadë Jesús stubi. El quë narbe'qui bëní quëbézi' cusechë hashtë tsalú tiempë shtë guiu. Quëbézi' con pacënci hashtë tiempë shtë cusechë. ⁸Zni zac lë'ë të napë quë gapë të pacënci sin adë rëazë guétëdi'il lu shnezë më purquë hia mërë lë'ë Dadë Jesús guëabrí stubi. ⁹Dadë, adë rdchí'bèdi'i të galquíá cuntrë sa'l të parë adë gáquëdi'i condenárëll, purquë lë'ë më el quë narunë juzguë, hia zugá'ai' guëlladchi. ¹⁰Bëchi narac shtua'a, gulë bëagná ldu'u të ra nabiadi'dzë shti'dzë Dios guahietë. Guzac zi rai' perë gupë rai' pacënci. Biadi'dzë rai' shti'dzë më lu ra mënë. ¹¹Guná, lë'ë hia'a rni'i hia'a rquitë ldu'u ra mënë narzac zi por shti'dzë më. Nané të shcuendë Job; gúqui' më pacënci nu nané të lla bè'në ldai' Dios lë'i' despuësë de zihani prëbë. Pues lë'ë Dadë rga'a ldú'i' lë'ë hia'a nu nalë rac shtu'u më lë'ë hia'a.

¹²Subrë todë, bëchi, adë rúnëdi'il jurar por gube'e, nilë por guédchiliu, ni por stubi juramentu. Iurní guëni'i të: "Aha!", pues gaquin zni. Si talë guëni'il: "Aquëdi'i", pues gaquin zni. Bastë con di'dzë ni. Rquí'nidi'i guëni'il

juramentu të adë gunë më juzguë lë'ëll.

¹³Si tubi de lë'ë të riá ldú'ul lu ra galguidzë, pues guni'i lu Dios lo quë narac shtú'ul. Si talë tubi de lë'ë të rquitë ldú'ul, bi'ldi labansë lu më.

¹⁴Si talë tubi de lë'ë të rac llú'ul, pues guná'bë ra më gushë entrë ra shmënë Dios të guëna'bë rai' lu Dios por lë'ëll, nu guëte'bi rai' sèiti guéquëll mientras quëgna'bë rai' lë Dadë. ¹⁵Si talë guëna'bë rai' nu tsaldí ldu'u rai' Dios, lë'ë fërmë gac salvárëll lu galguidzë; guëáquëll. Lë'ë Dadë gunëac më nguii ni, nu si talë bè'nëll duldë, gunë më perdunë lë'ëll. ¹⁶Gulë guni'i lu sa' të faltë nanápël nu gulë guna'bë lu Dios por cadë tubi sa'l të parë gunëac më lë'ë rai'. Iurë tubi nguii naná rialdí ldu'i Dios quëgná'bëll lu më con guëdubinú ldú'ull, pues Dios rúni' cusë ru'bë parë nguii ni. ¹⁷Lë'ë Elías, el quë nabiadi'dzë shti'dzë Dios, gúqui' tubi nguii ziquë lë'ë hia'a con mizme galdebilidá perë iurë lë'i' guná'bëi' lu Dios de quë adë ldáguëdi'i guiu lu guédchiliu, pues adë guláguëdi'i guiu por tsunë izë guërudë. Elías guná'bëi' lu më con guëdubinú ldú'i'. ¹⁸Despuësë guná'bëi' lu më stubi, iurní bëabrí gulaguë guiu nu ra guiu'u bédë'ë cusechë.

¹⁹Bëchi, si talë tubi de lë'ë të guëlua'a téchil lu diza'quë nu stubi sa' të guèdchigrëll hiumbrë ni lu verdá, ²⁰gulë bédë'ë cuendë de quë mënë ni nabédchigrë lë'ë pecadurë parë nezë mal shténëll, gunë mënë ni salvar lë'ë pecadurë të gátidi'ill. Nu mizme tiempë gac perdunë zihani duldë shtë pecadurë; adë gac bè'a mieti pë bè'ni'.